

CARTA JA NI NTEE SANTIAGO NUU NDA NCHIVI CANDIJA

1 ¹Maá nī cúu Santiago, mozo Yāā Dios jín Jētohō ō Jesucristo. De tēe nī carta yáhá cuēē nūū ndá nú nchivī cándíja jā cúu nú ndihúxī ūū tatā Israel, de nī jītē nuu ndá nú ní ñayiví. Sáhá ndeé inī ndá nú.

Yāā Dios sáhá jā jícūhun inī ō

²Ñanī mánī, cusii ndasí inī ndá nú de tú quiqi quéhén nūū tūndóhó sīquī nū.

³Chi jínī ndá nú jā tú jíto túnī tūndóhó ndóhó tú cándíja nīhin nú, de ñúcuán cúu jā scúja ánō nū jā cuandeé inī nū.

⁴De cuandeé inī nū jondē cuja vāha nú jín tūndóhó, tácuu cuu sáhá nú ndācá tiñu vāha, de mā cúmanī jā squíncuu vāha nú nūū yā.

⁵De tú ní iin nú cúmanī jā jícūhun inī nū caca ndíchí nú jín tūhun Yāā Dios, de cācān nū nūū yā, de sáhá yā jā jícūhun inī nū. Chi sáhá yā ndihi jā jícān nchivī, de nduú cúxeēn yā nūū jī jā jícān jī.

⁶De tá jícān nū, de cánuú candíja nú jā sáhá yā jā jícān nū, de mā cānī síquí inī nū. Chi nchivī jā jáni síquí inī, cúu jī tá cúu ndute mar jā jísō de cuāhān cháhá chúcuán sáhá tāchī.

⁷Nchivī ñúcuán mā cānī inī jī jā sáhá Jētohō ō jā jícān jī.

⁸Chi nchivī jā jáni ūū inī, chi maá-ni jā násāma inī jī jín ndācá tiñu sáhá jī.

⁹Ndācá hermano ndāhví, ná cúsi inī dē jā sáhá Yāā Dios jā cuñáhnú dē.

¹⁰Sochi hermano cuicá, ná cúsi inī dē tú nī ndundáhví dē. Chi ndācá tēe cuicá, ñamā náā jā cuicá dē, tá cúu jā ñamā náā itā yūcū.

¹¹Chi tá quēnda ncandiī de cúhihní, de yíchī-ni yūcū, de cóyo-ni itā, de náā-ni jā vii cáá. De suni súcuán ndoho ndá tēe cuicá juni íyó dē jín ndá tiñu sáhá dē.

Sīquī jā jíto túnī tūndóhó yóhó

¹²Nācā ndetū tēe jā jéndeé inī dē tú jíto túnī tūndóhó dē. Chi tá ja nī ncundeé dē jín, de nīhin dē premio jā cuñáhnú dē cutecū dē ní cānī. Chi súcuán nī nquee yuhú Yāā Dios jā cuāha yā nūū nchivī jā mānī jín yā.

¹³Tú iin nchivī cúu inī ji sáhá ji cuāchi, de mā cānī inī ji jā nūū Yāā Dios vāji jā cúu inī ji sáhá ji cuāchi. Chi ni iin mā cūú cuitī sáhá jā quīvi Yāā Dios cuāchi, de juni maá yā nduú squívi yā ni iin nchivī nūū cuáchi.

¹⁴Chi sa jā ndíyo inī maá ji, suu sáhá jā cúu inī ji sáhá ji cuāchi, de scándā inī ji, chi suu ñúcuán cúu jā stáhvī.

¹⁵De jā ndíyo inī ji, ñúcuán cúu jā squíjéhé cuāchi. De cuāchi ñúcuán, tú ja nī ncunīhin, de sáhá jā tánū tāhvī nchivī.

¹⁶Túsaá de mā stívī ndá nú jín ndá jā jáni inī nū, ñanī mánī.

¹⁷Ndācá jā cútahvī ō jā vāha jā vii íyó, chi vāji ichi andiví nūū maá Yāā Dios, Yāā jā ní nsáhá ndācá jā jéhe nduva jā íyó andiví. De maá yā nduú násāma cuitī inī yā tá cúu nūū násāma nduva jín cōndāhvī.

¹⁸De nī nsáhá yā jā cúu ó sēhe yā, chi nī ncandíja ó tūhun ndāā yā. De nī nduu ó tá cúu sēhe xíhna ñúhún yā nūū ndá cā sēhe yā jā quiji, chi súcuán nī jētahān inī yā sáhá yā.

Siqui nāsa chíñúhún ndāā ō yā

¹⁹Túsaá de ndá ndóhó ñanī mánī, ñamā tee sōho nú tūhun yā, sochi mā cáhān ñamā nū ni mā quítī ñamā inī nū.

²⁰Chi nchivī jā quítī inī, nduú sáhá ji tiñu ndāā jā cúnī Yāā Dios.

²¹Túsaá de siāā nū ndācá tiñu téhén jín tiñu néhén jā ní ncāyā jín nú. De coo vitá inī nū de cuetáhvī nú tūhun yā jā ní nquīvi inī ánō nū. Chi tūhun ñúcuán ndíso poder jā cācu ánō nū.

²²De squíncuu nú jā stéhén tūhun yā, de nsūú maá jā cunini nú súcuán-ni, chi tú súcuán de stáhvī ndá nú maá nú, chi nduú níhín tiñú de tú nduú squíncuu nú.

²³Chi tēe jā níni dē tūhun yā súcuán-ni, de nduú squíncuu dē, cúu dē tá cúu iin tēe jā ndéhé dē nūū espejo nāsa cáá nūū dē.

²⁴De ndéhé vāha dē nūū dē, de cuāhān dē-ni, de sá de náā inī dē nāsa cáá nūū dē.

²⁵Sochi tú iin tēe nduú náā inī dē tūhun jā níni dē, chi sa chúhun vāha inī dē jā cáhān maá ley ndāā Jesús jā ní nsáhá libre yóhó, de tú cuiñi níhin dē jín, de squíncuu dē jā ndācu, ñúcuán de coo ndetū dē jín tiñu vāha jā sáhá dē.

²⁶De tú ní iin ndá nú jáni inī nū jā chíñúhún vāha nú Yāā Dios, de tú nduú jító nú yáá nú, túsaá de stáhvī nú maá nú, de nduú jétíñú cuitī jā chíñúhún nú yā.

²⁷Nchivī jā chíñúhún ndoo chíñúhún ndāā ji maá Tatá ó Yāā Dios, tiñu yáhá sáhá ji: Chíndeé ndá ji sūchí jā ní nquendōo ndáhvī, jín ndá ñahan jā ní nquendōo ndáhvī, tú nā-ni tūndóhó íyó. De nduú sátéhén ji ánō ji jín tiñu néhén jā íyó inī ñayiví.

Jā má cúyichī inī ō cunī ō nchivī ndāhvī

2 ¹Ñanī mánī, cándíja ndá nú Jētoho ō Jesucristo jā viī cúñáhnú yā. Túsaá de mā cúyichī inī ndá nú nchivī ndāhvī, chi inuú sáhá nú jín ndihi nchivī.

²Chi íyó vuelta jā quívi iin tē inī vehe nū ndútútú ndá nú, de ñúhún xehe oro ndahá dē, de ñúhún dē sahma váha. De suni íyó vuelta jā quívi iin tē ndāhvī, de ñúhún dē sahma tehndé.

³De nduú vāha de tú sáhá yínúhún nú jín tē ñúhún sahma váha, de cahān nū jín dē: Cundeē ní lugar vāha yáhá. De cahān nū jín tē ndāhvī: Ñúcuán cuiñi ní, á yáhá cundeē ní nū ñúhún, cachī nū.

⁴De tú súcuán sáhá ndá nú, de nduú jáni vāha inī nū sīquī táhán nú, chi sín sáhá nú jín tē cuíca jín tē ndāhvī.

⁵Ñanī mánī, chuhun inī ndá nú tūhun cáhān ni: Yāā Dios nī nacāji yā nchivī ndāhvī inī ñayiví yáhá jā coo cuíca ji jín tūhun cándíja ji yā, de ñihīn ji táhvī ji inī ñuú nū tátúnī yā. Chi nī nquee yuhú yā jā cuāha yā ñúcuán nū nchivī mānī jín yā.

⁶De sa ndá máá nú jēhe nú tūhun canoō nchivī ndāhvī. ¿De á nsūú ndá tē cuíca cúu jā stāhvī ndá ndóhó sīquī jā ñihīn dē xūhún nú, de ñamā cáhān dē cuāchi sīquī nū nū justicia?

⁷De suni cáhān nēhén ndá dē sīquī Cristo, de suu síví maá yā cúu jā nání ndá nú cristiano.

⁸Vāha sáhá ndá nú de tú squíncuu ndija nú maá tūhun ñáhnú cā jā cáhān ley, tá cúu nū yósō nū tutū ī: Cundāhvī inī nū táhán nú tá cúu nū cundāhvī inī nū maá nú, cáchi.

⁹De tú sín sín sáhá nú jín nchivī cuíca jín nchivī ndāhvī, túsaá de cuāchi sáhá ndá nú, de ndéē cuāchi sīquī nū jā stíví nú ley Yāā Dios.

¹⁰Chi tú iin nchivī stíví ji iin-ni tiñu jā ndácu ley, de vísō ná squíncuu ji ndihi cā, de cúu tá cúu jā ní stíví ji ndihi ley, de ndihi ñúcuán cundeē cuāchi sīquī ji.

¹¹Chi Yāā Dios jā ní ncāhān yā jā má cásíquí ndéē táhán nú, suni nī ncāhān yā jā má cáhni nū ndiyi. De vísō nduú ní ncásíquí ndéē táhán nū, sochi tú nī jahnī nū ndiyi, túsaá de ja nī stíví ndihi nú ley.

¹²De ndācā jā cáhān nū jín jā sáhá nú, chi cánuú sáhá nú cuenta jā sáhá ndāā yā ndihi ñúcuán jín maá ley Jesús jā ní nsáhá libre ndóhó.

¹³Chi quivī jā sáhá ndāā yā tiñu, de nchivī jāá nduú ní ncundāhvī inī táhán, suni mā ñihīn ji tūhun cundāhvī inī. Sochi nchivī jā ní ncundāhvī inī táhán, de maá quivī juicio jā sáhá ndāā yā tiñu de cusiī inī ji jā ní sndāhvā yā cuāchi ji.

Nduú jétíñú jā cándíja ó de tú nduú squíncuu ó

14Ñanī mánī, tú cáhān iin tēe jā cándíja dē jā sáhá yā jēhē dē, de tú nduú sáhá dē tiñu váha, ¿de nāsa nīhīn tiñú jā sūcuán? ¿A cuu cācu ánō dē jín jā cáhān dē-ni jā cándíja dē, de tú nduú sáhá dē tiñu váha?

15De tú iin hermano á hermana ndācá ó, cúmanī sahma ji jín jā cajī ji ndācá quivī,

16de tú ní iin ndá nú cáhān jín ji: Sáhá ndeé inī nū, de cusúcún vāha nú de cajī vāha nú, cachī nū jín ji, de tú nduú jēhe nú jā jínī ñúhún ji cutecū ji, ¿de ní tiñu jā cáhān nū sūcuán?

17De suni sūcuán cúu jā tú cáchī nū jā cándíja nú jā sáhá yā jēhē nū, de tú nduú sáhá nú tiñu váha, túsaá de nduú nīhīn tiñú cuitī jā cáhān nū jā cándíja nú.

18Sochi sanaā de cāhān iin nchivī: Ndóhó chi cándíja nú jā sáhá yā jēhē nū, de nduhū chi sáhá nī tiñu váha. ¿Nāsa stéhēn nū jā cándíja nú jā sáhá yā jēhē nū, de tú nduú sáhá nú tiñu váha? De nduhū chi sáhá nī tiñu váha, de sūcuán stéhēn nī jā cándíja nī jā sáhá yā jēhē nī.

19Ndāā chi cándíja nú jā íyó iin-ni Yāā Dios. De va íyó vāha túsaá. Sochi ndá tächī chi suni sūcuán cándíja, de quisi jā yúhú, chi nduú sáhá tiñu váha.

20¿De nūcu nduú jícūhun inī ndá nú? ¿A nduú jínī nū jā tú nduú sáhá nú tiñu váha, de nduú nīhīn tiñú cuitī jā cáhān nū jā cándíja nú?

21De tata ō Abraham, nī sndáhvā yā cuāchi dē sīquī jā ní nsáhá dē tiñu váha. Chi nī jetáhvī dē jā ní ncāhān yā jā cahnī dē sēhe dē Isaac, sōcō dē ji nūū altar.

22De jícūhun inī ndá nú jā sīquī jā ní ncandíja dē jā sáhá yā jēhē dē, suu sīquī ñúcuán cúu jā ní jetáhvī dē tá nī ncāhān yā jā sōcō dē sēhe dē. De jā ní jetáhvī dē, sūcuán nī stéhēn dē jā cándíja ndija dē jā sáhá yā jēhē dē.

23De sūcuán nī nquee ndāā tūhun jā cáhān tutū īī: Abraham nī ncandíja dē jā sáhá yā jēhē dē, de jā ñúcuán nī sndáhvā yā cuāchi dē, cáchī tutū. De nī jēcunaní dē amigo Yāā Dios.

24Túsaá de ja nī jinī ndá nú jā sndáhvā Yāā Dios cuāchi nchivī jā sáhá ji tiñu váha sīquī jā cándíja ji jā sáhá yā jēhē ji, de nsūú maá-ni jā cáhān ji jā cándíja ji.

25De suni sūcuán Rahab, vísō ñahan ndiī nī ncuu ña xihna cā, de nī sndáhvā yā cuāchi ña sīquī jā ní nsáhá ña tiñu váha. Chi nī jēhe núú ña vehe nūū ndá mozo jā ní ntají Josué, de nī nchuhun ña dē incā ichi, tácuā cācu dē nūū ndá tēe ndúcú cahnī dē. De jā ñúcuán nī sndáhvā Yāā Dios cuāchi ña.

²⁶De iin nchivī tú nduú cā ánō ji nūū yiqui cúñu ji, de ndīyi cúu ji. De suni súcuán tú cándija ó jā sāhá yā jēhē ō, sochi tú nduú sāhá ó tiñu váha, de cúu ó tá cúu ndīyi.

Tūhun sīquī yáá ó

3 ¹Nanī mánī, mā cānī inī cuāhā táhān nū jā cuu nú maestro jā stéhēn tūhun yā. Chi jínī ndá nú jā ndá máá ó jā stéhēn tūhun, cuāhā cā cuāchi nacunehen yā sīquī ō.

²Chi ndihi ó stívī cuāhā tiñu. De tú iin tēe cuu coto dē yáá dē jā má stívī dē jínī ni iin jā cáhān dē, tú súcuán de váha ndasí tēe cúu dē, de suni cuu coto dē ní cā dē jā má stívī dē.

³Chi cúu tá cúu jā chühún ó freno yuhú caballo, de súcuán jáhnū ō ní tī jā quihīn tī ní-ni cúu nūū cúnī ō.

⁴De suni súcuán ndācá barco, vísō náhnū ndasí, de vísō nīhin chindahá tāchī, de jínī iin timón lulí-ni de cuu scuícó tēe scāca, de quihīn dē jínī ní-ni cúu nūū cúnī dē.

⁵De suni súcuán cúu yáá ó, chi vísō lulí-ni, de cuāhā ndasí sāhá ó jínī. De suni jínī ō jā iin ñuhūn lulí de cuu scuíquīn jā cāyū iin yucu cáhnū ndasí.

⁶De suni súcuán cúu yáá ó, chi sāhá tá cúu iin ñuhūn, chi scuíquīn cuāhā ndasí tiñu nēhén. De yáá ó cúu iin parte lulí yiqui cúñu ó, de sāhá jā quívi ní ó cuāchi. Chi jondē infierno vāji ndācá tūhun nēhén jā cáhān ō, de yáá ó scuíquīn cuāhā tiñu nēhén ní tiempo jā ndēē ō inī ñayiví.

⁷De nchivī chi cuu cāhnū ji ndācá nūū quiti jínī saā jínī cōō jínī quiti ñúhún inī mar, de ja nī jáhnū ji cuāhā tī.

⁸Sochi ni iin nchivī mā cūú cāhnū ji yáá ji. Chi iin jā nēhén jā má cūú cāhnū ji cúu. De tá cúu yuhú cōō jā ñúhún chitú veneno jā jáhnī, súcuán cúu yáá ó.

⁹De jínī yáá ó de chíñúhún ó Tatá ó Yāā Dios, de suni jínī yáá ó de cáhān nēhén ó sīquī nchivī jā ní nsāhá yā ánō ji tá cúu nūū íyó maá yā.

¹⁰Iin-ni yuhú quée tūhun chíñúhún ó yā jínī tūhun cáhān nāvāha ó. Nanī mánī, nduú íyó váha cuitī jā súcuán.

¹¹¿A iin-ni sócō quēne ndute váha jínī ndute úguā, á naá cúu?

¹²Nanī mánī, ¿á cuu cuun ndihā oliva xīnī ñutun higo, de á cuu cuun ndihā higo ndahá yūcū uva, á naá cúu? De suni súcuán iin sócō mā cūú quene ndute úhguā jínī ndute váha.

Tūhun ndíchí jā vāji nūū Yāā Dios

¹³De tú ní iin nú ndíchí de jícūhun váha inī nū, túsaá de jínī jā jíca ndaā nū de stéhēn nū jā súcuán cúu nú. De sāhá suchí nú maá nú sīquī jā névāha nú tūhun ndíchí yā.

¹⁴Sochi tú cúcuásún ndasí inī ndá nú de tú ndúcú nú jā cuñáhnú maá nú, túsaá de mā cútéyíí nú canī inī nū jā ndíchí nú. Chi suu cúu jā stáhví nú, de cúu nú contra sīquī tūhun ndāā.

¹⁵Chi nchivī jā íyó súcuán, nsūú nū Yāā Dios vāji jā ndíchí ji. Chi cuenta ñayiví cúu, jíín cuenta nchivī jā cánēhén ánō ji, jíín cuenta maá tāchī cúñáhnú cúu.

¹⁶Chi nū íyó nchivī cúcuásún inī jíín nchivī ndúcú jā cuñáhnú maá, suu ñúcuán íyó tūhun sácā nuu jíín ndācá tiñu néhén.

¹⁷Sochi tūhun ndíchí jā vāji nū Yāā Dios, tá nī nsāhá jā ní ndundíchí nchivī, ñúcuán de íyó ndoo ánō ji. De suni ndéē mānī ndá ji jíín táhán ji, de vitá inī ji, de nduú nīhin inī ji. De cúndáhví inī ji táhán ji, de sáhá ji tiñu váha. De suni íyó ndāā ji, de nduú stáhví ji.

¹⁸De nchivī jā ndéē mānī jíín táhán, jíín tūhun mānī sáhá ji ndācá tiñu ndāā, de nīhin ji jā quendōo ndāā ji.

Mā cútóó ó ndācá jā íyó inī ñayiví

4 ¹¿De nāsa quíjéhé jā cánāá ndá nú jíín jā tétáhnán nú? Quíjéhé sīquī jā ndíyo inī nū ndācá jāá nduú vāha, de suu scándā ndasí inī ánō nū.

²Chi ndíyo inī ndá nú, de nduú névāha nú, de suu sáhá jā jáhni nū ndiyi. Ndíyo inī ndá nú jā névāha táhán nú, de nduú níhin nū, de suu sáhá jā tétáhnán nú de cánāá nú. De nduú níhin nū jā cúnī nū, chi nduú jícān nū nū Yāā Dios.

³De tú jícān nū, de nduú níhin nū, chi nduú jícān vāha nú, chi maá-ni jā cúsiī inī maá nú cúu jā jícān nū nū yā.

⁴Nchivī jā sndóo Yāā Dios cúu ndá máá nú. ¿A nduú jínī nū jā tú cútóó inī nū jā íyó inī ñayiví, ñúcuán cúu jā jínī ūhvī nū Yāā Dios? Chi nchivī jā cútóó inī jā íyó inī ñayiví, ndúu ji nchivī jā jínī ūhvī nū Yāā Dios.

⁵De nduú cáhān cáhá tūhun yáhá jā yósō nū tutū īi: Maá Espíritu jā ní jēhe Yāā Dios jā ndéē inī ō, cútóó ndasí yā yóhó, chi mānī yā jíín ó, cáchī.

⁶De jā váha inī Yāā Dios, de jēhe yā fuerza inī ō jā má sáhá ó súcuán. Chi cáhān tutū īi: Yāā Dios jāsī yā nū nchivī jā sáhá téyíí maá, de vāha inī yā chindeé yā ndá nchivī jā sáhá suchí maá, cáchī.

⁷Túsaá de cuetáhví ndá nú nū Yāā Dios. De cuiñi nīhin nú jā má cuetáhví nú tāchī cúñáhnú, de cunu cunī ndá ndóhó.

⁸Mānī cā coo nú jíín Yāā Dios, de víhí cā stéhēn yā jā mānī yā jíín nú. Ndá ndóhó jā sáhá cuāchi, sáhá ndoo nú maá nú, sndóo nú cuāchi. De ndá ndóhó jā cúnī nū coo mānī nū jíín Yāā Dios de suni cúnī nū cutóó nú jā íyó inī ñayiví, sáhá ndoo nú ánō nū jā má cōó cā nū súcuán.

⁹Natahúhvī inī nū, de cucuécá inī nū, de cuacu nú sīquī jā íyó cuāchi nú. De vísō nī jācū nū, sochi mitan de cuacu cóhó nú. De vísō nī ncusiī inī nū, sochi mitan de nducuécá inī nū.

10 Sāhá suchí nú maá nú nū Yāa Dios, de sāhá ñáhnú yā ndóhó.

Mā cúndihvī inī ō sīquī cuāchi táhán ó

11 Hermano, mā cáhān nēhén ndá nú sīquī táhán nú. Chi tēe jā cáhān nēhén sīquī táhán, á jā ndíhvī inī sīquī cuāchi táhán, chi modo jā sīquī ley Yāa Dios cáhān nēhén dē. Chi nduú squíncuu dē ley jā cáhān jā cundáhvī inī ō táhán ó, de sáhá dē cuenta jāá nduú íyó ndāa ley yā. De tú cáhān nū jāá nduú íyó ndāa ley yā, túsaá de nsūú jā squíncuu nú, chi sa jā cáhān nū sīquī.

12 Íyó iin-ni Yāa jā ní jēhe ley, de mátúhún-ni yā cúu jā sáhá ndāa sīquī cuāchi. De scácu yā nchivī cándíja, de stánū tāhvī yā nchivī nduú cándíja. ¿Túsaá de nā tiñu ndíso nú jā sáhá ndāa nū sīquī táhán nú?

Nduú vāha jā sāhá téyíí ó maá ó

13 Mitan de cáhān ni jín ndá ndóhó jā cáhān súcuán: Mitan á stēen de cōhōn ñuū ñúcuán, de cundeē ō iin cuīyā, de cueen ó xícó ó de nihīn ō sīquī, cáchī nū.

14 De nduú jínī cuitī nū nāsa coo stēen. ¿Chi nā váha víhí cúu vida nū? Cúu tá cúu iin vīcō nūhún jā iin núnúú-ni núcūhun, de ñúcuán de ndúte-ni.

15 De sa vāha cā cáhān nū: Tú cúnī maá Jētohō ō de cutecū ō de sáhá ó yáhá á sáhá ó ñúcuán, cachī nū.

16 Sochi cúsa maá jā cáhān téyíí ndá nú. De nduú vāha jā súcuán sáhá téyíí nú maá nú.

17 De tú iin nchivī jínī ji sáhá ji tiñu váha, de tú nduú sáhá ji, de cuāchi cúu túsaá.

Tūhun jā cáhān nū ndá tēe cuicá

5 ¹De cáhān ni jín ndá ndóhó tēe cuicá, jā cuacu nú de cuacu cóhó nú sīquī tūndóhó jā quiji sīquī nū.

²Chi ndatínú cuicá jā névāha nú, ja téhyū. De sahma váha nú, ja yáji tiquixīn.

³De oro jín plata jā névāha ndá nú, chi ja néne xaha. De xaha ñúcuán stéhēn jāá nduú ní nsáhá vāha nú jín xūhún nú. De ñúcuán cúu jā ndunīhin cuāchi sīquī nū, tá cúu iin ñuhūn jā snāa yiqui cúñu nú. Chi nī nascáyā cuāhā nū ndatínú váha ndá quivī cuándihi yáhá.

⁴De ndá tēe jā ní jehndē trigo nū, nduú ní nchúnáa vāha nú yāhvi dē. De mitan de cána jee ndá dē nū Yāa Dios, Yāa cúu Jētohō nū ndá ángel andiví, jā súcuán nī nsáhá ndá nú. De níni yā jā cána jee ndá tēe nī jehndē trigo nū.

⁵Vāha ndasí técu ndá nú inī ñayiví yáhá, de sáhá nú ndācá jā cúsiī inī maá nú. De jító vāha nú maá nú, de cúu nú tá cúu quiti néñu jā ndétu quiví jā cuū.

⁶De nī ntee ndá nú cuāchi sīquī ndá nchivī vāha, de jondē nī jahnī nū ji. De nduú ní ncúu casī ji jā sáhá nú.

Jā ná cóo paciencia inī ō de cācān táhvi ō

⁷Hermano, túsaá de coo paciencia inī ndá nú jā cundetu nú jondē quiví jā nenda maá Jētohō ō. Ndá tēe jā sātínú ñuhun, cánuú coo paciencia inī dē cundetu dē jondē quiji sāvī néhēn jín sāvī temporal, de sá de nīhīn dē nūnī vāha jā jēhe itū.

⁸De suni súcuan coo paciencia inī nū, de ndeé coo inī nū cundetu nú, chi cuācuñatin nenda maá Jētohō ō.

⁹De mā cāhān sōó nú sīquī jā sáhá táhán nú, hermano, tácuā mā jícundēe cuāchi sīquī nū. Chi maá Yāa jā sáhá ndāa cuāchi, ja ñatin nenda yā.

¹⁰Ñanī mánī, cunahán ndá nú nāsa nī nsāhá ndá tēe nī nacani tūhun maá Jētohō ō jondē janahán, chi nī ncuu ndá dē iin ejemplo nū ō. Chi vísō nī ndoho dē, de nī iyo paciencia inī dē.

¹¹De cāhān ō jā nchivī jā jēndeé inī jín tūndóhó, íyó ndetū ji sáhá Yāa Dios. Chi nī jini ndá nú tūhun nāsa nī jendeé inī Job jín tūndóhó, de suni jínī nū jā vāha ndasí cā nī nquendōo dē nī nsāhá maá Jētohō ō tá nī nchāha tūndóhó. Chi cúndáhvī ndasí inī yā yóhó, de vāha ndasí inī yā jín ó.

¹²Ñanī mánī, jā cánuú cā cúu jā má cāhān nū sívī Yāa Dios jín tūhun jā cāhān téyíí nú. Mā cāhān nū verdad de Dios, Yāa ndēe andiví, de nī mā cāhān nū verdad de Dios, Yāa xíí ñayiví, de nī iin cā tūhun súcuan mā cāhān téyíí nú. Chi tú cāhān nū jā cuu, de súcuan-nī cāhān nū. De tú cāhān nū jāá nduú, de súcuan-nī cāhān nū. Mā scāa cā nū cāhān nū, tácuā mā nácunehen Yāa Dios cuāchi sīquī nū.

¹³De tú íyó iin nú jā ndóho tūndóhó, de cācān táhvi nū. De tú íyó iin nú jā cúsiī inī, de cata nú himno jā chiñúhún nú yā.

¹⁴De tú íyó iin nú jā cúhū, de cana nú ndá tēe cúñáhnú jā jító nchivī cándíja. De ná cācān táhvi ndá dē jēhē nchivī cúhū. De jín sívī maá Jētohō ō ná chíhi dē aceite ji.

¹⁵De tú cándíja dē jā sáhá Jētohō ō jā jícān táhvi dē, núcuán de scácu yā nchivī cúhū. Chi nasāhá vāha yā ji, de tú nī nsāhá ji cuāchi, de cune cáhnú inī yā nū ji.

¹⁶Tú súcuan de nacani ndāa ndá nú cuāchi nú nū táhán nú, de cācān táhvi nū jēhē táhán nú tácuā nduvāha ndá nú. Chi tú ndíhvi inī iin nchivī ndāa jā jícān táhvi ji, de vāha ndasí nīhīn tiñú, chi sáhá yā jā jícān ji.

SANTIAGO 5

¹⁷Chi Elías, tēe nī nacani tūhun Yāā Dios janahán, suni iin tēe jā tá cúu nūū íyó maá ó nī ncuu dē. De nī jicān táhvī ndasí dē jā má cūún sāvī, de nduú ní ncúun sāvī ūnī cuiyā jín iñū yōō.

¹⁸Ñúcuán de nī jicān táhvī tucu dē, de nī ncuun sāvī, de nī nquene tucu ndācá jā quéne nūū ñūhún.

¹⁹Nanī mánī, tú iin nú nī sndóo ichi ndāā, de tú incā nū nachuhun ichí nú táhán nú,

²⁰tú súcuan de cunī nū jā tú nī nachuhun ichí nú tēe nī nquīvi cuāchi, de ja nī scácu nú dē jā tñnū táhvī dē nícu, de súcuan íyó tūhun cáhnú inī nūū cuāhā cuāchi dē.